

ՊԱՏՄԱԿԱՆ**ՄԱՅՐԱՆՈՒՇ ՊՕՂՈՍԵԱՆ**

Երեւանի Պետական Համալսարանի
Սփիւռքագիտութեան ամբիոնի ասպիրանտ

**ԽԱՌՆԱՄՈՒՄՆՈՒԹԻՒՆՆԵՐԻ ՀԻՄՆԱԽՆԴԻՐԸ
ՀԱՅԿԱԿԱՆ ՍՓԻՒՈՔՈՒՄ**

Հայաստանի եւ դեռեւս չճանաչուած Լեռնային Ղարաբաղի Հանրապետութիւններից դուրս բնակուող հայը ամենօրեայ պայքար է մղում հայ մնալու եւ ձուլման վտանգներին դիմակայելու համար: Քանի որ խառնամուսնութիւնները ներկայ աշխարհում հանդիսանում են ուծացմանը նպաստող ամենավտանգալուր գործոններից մէկը, սոյն յօդուածում անդրադառնում ենք խառնամուսնութիւնների հիմնախնդրին, որի ուսումնասիրութիւնը, լուսաբանումը եւ ներկայացումը, մեր կարծիքով, արդիական նշանակութիւն ունի:

Սփիւռքի հայ համայնքների անվտանգութիւնն ունի երկու բաղադրիչ՝ ֆիզիքական եւ հոգեւոր: Ֆիզիքական բաղադրիչը յանգում է հայ համայնքների գոյութեանը, իսկ հոգեւորը՝ նրանց ազգային նկարագրի պահպանմանը: Սփիւռքի հայ համայնքների առջեւ ֆիզիքական եւ հոգեւոր անվտանգութեան առումով կանգնած են հիմնականում չորս մարտահրաւէրներ: Դրանք են՝ ինքնութեան բաղադրիչների կորուստը, խառնամուսնութիւնները, գոյապահպանութեան սպառնալիքները եւ արտագաղթը¹:

Սփիւռք ունեցող ազգերի եւ սփիւռքեան համայնքների հիմնախնդիրների շարքում աւանդական տեղ են զբաղեցնում ինքնութեան պահպանման հարցերը²:

Ինքնութեան բաղադրիչների կորուստը՝ լեզուի, մշակույթի, պատմական յիշողութեան եւ այլ բաղադրիչների աստիճանական մարումն է այն հայութեան շրջանում, որոնք բնակւում են Հայաստանի եւ Լեռնային Ղարաբաղի Հանրապետութիւնների սահմաններից դուրս: Բնակուելով օտար միջավայրում՝ նրանք, կամայ թէ ակամայ, ինտեգրւում են ընդունող հասարակութեան մէջ, կրում են այդ հասարակութեան սոցիալ-տնտեսական եւ մշակութային ազդեցութիւնը:

Խառնամուսնութիւնները, մի կողմից՝ իրենց բնակութեան երկրների հասարակութիւններում սփիւռքահայերի ինտեգրուածութեան ցուցիչ լինելով, միւս կողմից՝ նպաստում են հայ ինքնութեան խեղաթիւրման խորացմանը: Խառնամուսնական ընտանիքներում նոր սերունդը աւելի մեծ չափով եւ աւելի անմիջականօրէն է ենթարկւում օտար սոցիալ-մշակութային ազդեցութեանը: Եթէ հայկական ընտանիքներում նոր սերունդը միայն արտաքինից, այն է՝ հասարակական միջավայրի կողմից է են-

¹ Տե՛ս Հովհանն Վ., Հայկական սփիւռքի անվտանգութեան մարտահրաւէրները http://www.noravank.am/arm/issues/detail.php?ELEMENT_ID=12736

² Տե՛ս Մանուկեան Ս., Ինքնութեան պահպանման խնդիրները Սփիւռքում. Սոցիալ-հոգեբանական տեսանկիւն, http://www.noravank.am/arm/issues/detail.php?ELEMENT_ID=4843

Թարկում օտար սոցիալ-մշակութային ազդեցութեանը, ապա խառնամուսնական ընտանիքներում արդէն ներսից՝ ընտանեկան միջավայրից է իր վրայ կրում օտար մշակութային արժէքների ազդեցութիւնը³:

Ակնյայտ է, որ եթէ վերոնշեալ գործօններից առաջին երկուսը՝ ինքնութեան բաղադրիչների կորուստը եւ խառնամուսնութիւնները, առնչում են հոգեւոր անվտանգութեանը, ապա վերջին երկուսը՝ գոյապահպանութեան հարցն ու արտագաղթը, վերաբերում են ֆիզիքականին⁴:

Հայերի ընդհանուր քանակը ամբողջ աշխարհում կազմում է 10-12 միլիոն, որից միայն 3 միլիոնն է ապրում Հայաստանի Հանրապետութիւնում՝ ըստ պաշտօնական վիճակագրութեան⁵: Հայութեան մեծագոյն մասը այսօր ապրում է Հայաստանի Հանրապետութեան սահմաններից դուրս:

20-րդ դարի սկզբում Հայաստանից դուրս ապրող հայերի հաւաքական անուանումը եւրոպական լեզուներում դարձավ «diaspora» տերմինը /հայկական անալոգը հանդիսանում է հայերէն «սփիւռք» տերմինը/⁶: Բացի «սփիւռք» տերմինից, մեզանում շրջանառութեան մէջ է դրուել նաեւ «ցրոնք» տերմինը⁷:

Բոլոր պետութիւններում, բացի պետականակերտ էթնոսից /ազգից/, որպէս կանոն, կան նաեւ էթնիկ փոքրամասնութիւններ⁸: Էթնիկ փոքրամասնութիւնները հանդիսանում են այդ պետութիւնների լիիրաւ քաղաքացիները եւ ունեն նոյն իրաւունքները եւ պարտականութիւնները՝ ինչ պետականակերտ էթնոսի ներկայացուցիչները: Էթնիկ վերաբնակեցումները հանդիսանում են նոր սփիւռքերի ձեւաւորման հիմնական աղբիւրը⁹:

Հայկական սփիւռքը միաձոյլ կառոյց չէ: Այն նշանաւորւում է սեփական պատմութեամբ, զարգացման ուրոյն ձեւով: Ընդ որում իւրաքանչիւր համայնք ունի իր պատմութիւնը:

Հայկական սփիւռքն այսօր ունի բազմաթիւ խնդիրներ, որոնցից մեծագոյնը՝ ձուլման վտանգն է: Իսկ ձուլման առաջին պայմանը հանդիսանում է խառնամուսնութիւնը, երբ հայ երիտասարդները ամուսնանում են օտարազգիների հետ:

Ընտանիքն ազգի գոյութեան հիմնասիւնն է: Այն ապահովում է ազգի ժառանգական յաջորդականութիւնը, իրականացնելով իր ներսում աճող նոր սերնդի ազգային հիմնական դաստիարակութիւնը: Բնականաբար, ընտանիքի ապազգայնացումը, որն իրականացւում է արիւննախառնութեան եւ օտար բարքերի ընդօրինակման ձեւով, կործանարար է ազգի գոյութեան համար:

Խառնամուսնական ընտանիքում որքան էլ ամուսինները լինեն լայնախոհ կամ փոխադարձ սիրով կապուած, միեւնոյն է, նրանց հոգեկերտուածքի, էութեան բնական

³ Տէս Հովեան Վ., Հայկական սփիւռքի անվտանգութեան մարտահրաւերները: http://www.noravank.am/arm/issues/detail.php?ELEMENT_ID=12736 :

⁴ Տէս նոյն տեղում:

⁵ Տէս Ռիտտեր Լորան Հայկական ինֆոնոսփիւռքի Սփիւռքում.արդիականութեան եւ հայապահպանման միջեւ: <http://repairfuture.net/index.php/hy/identity-standpoint-of-armenian-diaspora-ar/armenian-identity-in-the-diaspora-between-modernity-and-preservation-armenian> :

⁶ Տէս Дятлов В., Мелконян Э., Армянская диаспора: очерки социокультурной типологии, Ереван 2009, с7.

⁷ Տէս Եղիազարեան Ա., Հայ սփիւռքի պատմութեան պարբերացումը, էջ 34: http://www.armin.am/images/menus/1929/Arman_eghiazaryan.pdf :

⁸ Տէս Մանուկեան Ս., Ազգամիջեան յարաբերութիւններն Ամերիկայում, 21-րդ դար, 1 (77), Երեւան 2018, էջ 4:

⁹ Տէս Сандул Я.В., Попытки типологизации диаспор в научной литературе. http://portalus.ru/modules/psychology/rus_readme.php?subaction=showfull&id=1266959616&archive=&start_from=&ucat= :

տարբերությունն ունենալու է իր դրսևորումները: Ամուսիններից մէկը զիջելու է իր ազգային ինքնությունը՝ ընտանիքը չքայքայելու կամ այլ պատճառներով: Իսկ նրանց երեխաները երկուսուրեքն մէջ են ապրելու, նրանց ներսում երկու տարբեր մարդկային տեսակների հոգեբանական պայքար է ընթանալու:

Դարեր շարունակ Հայոց եկեղեցին, արգելել է լուսաւորչական հայերի ամուսնությունն այլադաւանների հետ: Փաստօրէն, եկեղեցին, հասկանալով եւ խորութեամբ ըմբռնելով այլադաւանների հետ ամուսնութեան վնասակարությունը հայ ժողովրդի համար՝ անուղակի կերպով տաքու է դրել խառնամուսնությունների վրայ:

Այսօր խառնամուսնությունները դարձել են Հայկական սփիւռքի առջեւ ծառացած համար մէկ խնդիրներից մէկը:

Արդէն անհերքելի իրողություն է, որ սփիւռքեան իրականութեան մէջ գնալով պակասում են զուտ հայկական ընտանիքները: Լատինական Ամերիկայի երկրներում խառնամուսնությունները կազմում են աւելի քան 80%¹⁰: Ամերիկայում, մասնաւորապէս Հիւսիսային Ամերիկայում եւ Կանադայում, խառնամուսնությունները մօտաւորապէս 60% են կազմում¹¹:

Հայկական Սփիւռքը մենք, որպէս կանոն, բաժանում ենք դասական եւ նոր սփիւռքների: Այդ բաժանումը յատկապէս կիրառելի է խառնամուսնությունների պարագայում¹²:

Պէտք է նշել, որ դասական կամ հին սփիւռքը, որն իրենից մեծ մասամբ ներկայացնում է Ցեղասպանությունը վերապրածների չորրորդ կամ հինգերորդ սերունդը, հիմնականում խառնամուսնութեան ճանապարհով ազգային արժէքների կորստեան վտանգին ենթարկւում է շուրջ 100 տարի, որն էլ սփիւռքահայութեան թուաքանակի վրայ թողել է իր զգալի ազդեցությունը: Ըստ որում, դասական Սփիւռքը կարողացել է հիմնականում պայքարել ազգային արժէքների պահպանութեան, ազգային կառոյցների ստեղծման համար՝ պահպանելով հայկականությունը, մշակոյթը, աւանդոյթները: Սակայն յատկապէս Լատինական Ամերիկայի երկրներում, ԱՄՆ-ում, Աւստրալիայում աւելանում են խառնամուսնությունները¹³:

Խառնամուսնական ընտանիքներում ազգային ինքնութեան որակների հետ կապւած մեծ դժուարություններ են առաջանում. լեզու, աւանդոյթներ, կրօն, ներ-ընտանեկան յարաբերություններ, մասնակցություն ներ-համայնքային կեանքին, հայրենիքի հետ կապին եւ այլն:

Սփիւռքն իր գոյութեան առաջին օրերից նուիրուել է հայապահպանութեան, նոր սերնդի ազգային նկարագրի ձեւաւորման, ինքնութեան, մայրենի լեզուի, հայկական աւանդոյթների, սովորոյթների, մշակոյթի, հաւատքի, հոգեւոր արժէքների պահպանման ու փոխանցման շարունակական ապահովման աշխատանքներին¹⁴: Այն այստեղ հասցուած է ինստիտուցիոնալ ձեւայնացման եւ կարգաւորման բարձր մակարդակի¹⁵:

Տարիներ շարունակ հայապահպանութեան ազգանուէր գործը իրականացրել եւ

¹⁰ Տե՛ս Հայ ինֆոյթեան որակների պահպանումը խառնամուսնութիւններում, Գիտագործնական համաժողով, **Ձեկուցումների ժողովածու**, Երեւան 2010, էջ 9:

¹¹ Տե՛ս նոյն տեղում:

¹² Տե՛ս նոյն տեղում, էջ 10:

¹³ Տե՛ս նոյն տեղում:

¹⁴ Տե՛ս **Յակոբեան Հ.**, Հայաստան-Սփիւռք գործակցութեան զարգացում. Պետական փառաքանությունը (2008 - 2016թթ.), Հայագիտութեան հարցեր, Հանդէս 2 (11), Երեւան, ԵՊՀ հրատարակչութիւն 2017, էջ 16:

¹⁵ Տե՛ս **Վարսիկեան Ա., Ռ.**, Հայկական յետցեղասպանական սփիւռքի առանձնայատկութիւններ, <http://ysu.am/files/haykakan-hetceghaspanakan-spyurqi-arandznahatkutyunnery.pdf>, էջ 111:

իրականացնում են.

- Հայոց եկեղեցին
- Հայկական ավանդական կուսակցությունները
- Սփիւռքեան կառույցները:

Այստեղ կարելու է նաև միայն տեղական համայնքային ազգային, ազգապահպան կառույցներն ու միաւորները, այլ նաեւ մի շարք անդր-սահմանային, համահայկական ինստիտուտներ¹⁶:

Հայութեանը համախմբելու ու աջակցելու, նրանց մէջ վաղուայ օրուայ նկատմամբ յոյսն ու հաւատը անմար պահելու, նպատակասլաց գործունէութեան մղելու եւ վերջապէս նրանց մէջ հայկականութիւնը, ազգային արժէքները պահպանելու գործում վճռորոշ դերը ամէնից առաջ պատկանում է հայկական եկեղեցուն, որը սփիւռքում ծաւալած իր համապարփակ հոգեւոր եւ մշակութային եւ կրթա-լուսաւորչական գործունէութեամբ, իրաւամբ, կատարել է պետութեան դեր եւ իրականացրել համապատասխան գործառնություններ¹⁷: Եկեղեցին իր ազգապահպան գործունէութեամբ կարողացել է հետ պահել երիտասարդութեանը խառնամուսնութիւններից, որոնք, ինչպէս եւ օտար դպրոցներ յաճախելը, հայութեանը դէպի ուժացում տանող ամենավտանգաւոր գործոններն են¹⁸: Այս առումով Հայոց եկեղեցու դերը կարելի է անուանել բացառիկ:

Հայապահպանութեանն ուղղուած մեծ գործունէութիւն են ծաւալում նաեւ Հայկական ավանդական կուսակցությունները եւ սփիւռքեան կառույցները:

Վերոբերեալ կառույցների ամենօրեայ տքնաշան աշխատանքի արդիւնքում սփիւռքահայութեան մեծամասնութեան համար խորթ չէ մասնակցութիւնը ներհամայնքային կեանքին: Նրանք իրականացնում են բազմաթիւ եւ բազմապիսի համահայկական ծրագրեր, փորձում են սփիւռքահայ երիտասարդներին հաղորդակից դարձնել այդ ծրագրերին:

Յանուն ճշմարտութեան պէտք է արձանագրել, որ մեր հայրենակիցներից ոչ բոլորն են գնում եկեղեցի, կամ, ոչ բոլորն են ներգրաւուած այդ կառույցների աշխատանքներին: Սակայն, նրանց թիւը, ի ուրախութիւն մեզ, համեմատաբար փոքր է:

Հայ ինքնութիւնը սփիւռքում տասնամեակներ շարունակ հիմնուած է եղել լեզուի, կրօնի, ազգային մշակոյթի, Յեղասպանութեան յիշողութեան, հայկական ավանդական ընտանիքի պահպանման գաղափարների վրայ, որոնք էլ հանդէս են եկել որպէս ինքնագիտակցութեան բաղադրիչներ¹⁹:

Խառնամուսնական ընտանիքներում բախում են մշակոյթները, ավանդոյթները, լեզուները, երբեմն նաեւ հաւատները: Այդպիսի ընտանիքներում ծնուած երեխաների համար առաջանում են բազմաթիւ դժուարութիւններ: Երեխան իր ինքնահաստատման եւ ինքնաճանաչողութեան ամբողջ ընթացքում գտնւում է երկրնտրանքի մէջ: Այստեղ առաջանում է նաեւ օտար միջավայրում ապրելու խնդիրը:

Հարկ է նշել, որ Հայաստանի Հանրապետութիւնում նոյնպէս առկայ է խառնամուսնութիւնների խնդիրը: Հայաստանում խառնամուսնութիւններից ծնուած երեխաները, հիմնականում, յաճախում են հայկական դպրոցներ, մեծանում են հայկական

¹⁶ Տե՛ս նոյն տեղում, էջ 114:

¹⁷ Տե՛ս **Յարութիւնեան Ն.**, Սիրիայի եւ Լիբանանի հայկական դպրոցները, Երեւան 2002, էջ 19:

¹⁸ Տե՛ս նոյն տեղում:

¹⁹ Տե՛ս **Հովհան Վ.**, Հայ ինքնութիւնը Սփիւռքում 21-րդ դարում, http://www.noravank.am/arm/articles/detail.php?ELEMENT_ID=17939, 18.12.2018:

միջավայրում եւ նրանց հայկական ինքնութեան պահպանման խնդիրը առանձնակի սրութիւն չի ներկայացնում:

Խառնամուսնութիւնները ներկայ գլոբալիզացման գործընթացներում առաւել լայն ընդգրկում են ստանում: Հայ ժողովուրդը, որի 2/3-ը բնակւում է հայրենիքից դուրս, այդ վտանգին ենթարկւում է առաւել մեծ չափերով, կարելի է ասել ամէն օր: Երիտասարդ մարդը, որին ամէնից առաջ հետաքրքրում է կրթութիւնը, մարդկային կամ քաղաքական առաջընթացը, առաւել շատ է կտրւում հայկական կեանքից, միջավայրը, որտեղ հասունանում է, դառնում է աշխարհաքաղաքացի եւ, կապուելով այլ ազգերի ներկայացուցիչների հետ, խառնւում են երկու մշակոյթ, երկու սովորոյթ, երկու ականդոյթ, երկու կենցաղ, երկու լեզու, երբեմն նաեւ երկու կրօն:

Ինչպէս վերը նշեցինք, Հայկական սփիւռքը շատ բազմազան է եւ խայտաբղետ: Խայտաբղետ է նաեւ խառնամուսնութիւնների ցուցանիշը քրիստոնեայ եւ մահմեդական աշխարհներում:

Կարելի է նշել, որ խառնամուսնութիւնները սփիւռքահայերի մէջ, առաւել յաճախ, դիտարկելի են եւրոպական, քան մերձաւոր արեւելեան երկրներում, ինչն, անշուշտ, պայմանաւորուած է եւ կրօնական միջավայրի գործօնով: Եթէ քրիստոնէական միջավայրում այլազգու հետ ամուսնութիւնը չէր քաջալերւում ընտանիքը (աւագ սերունդը), ապա, մահմեդական միջավայրում, խառնամուսնութիւնը այլակրօնի հետ չէր քաջալերւում նաեւ հայ համայնքն ու եկեղեցին, որի ողջ ներուժն ուղղուած է ոչ միայն մշակութային, այլեւ հոգեւոր կրօնական ինքնուրոյնութեան պահպանմանը:

Քանի որ հայերը ապրում են աշխարհի ութսունից աւելի երկրներում, այս աշխատանքում կանդրադառնանք այն երկրներին, որոնցում հայերի թուաքանակը համեմատաբար մեծ է:

Ամերիկայի եւ Եւրոպայի հայութիւնը հիմնականում չունի գոյապահպանութեան եւ արտագաղթի խնդիրներ: ԱՄՆ-ը, Կանադան, Արեւմտեան եւ Արեւելեան Եւրոպայի երկրները հիմնականում աչքի են ընկնում ներքաղաքական կայունութեամբ: Այնտեղ սուր չեն նաեւ էթնիկ եւ կրօնական հակասութիւնները, որոնք ներքին եւ արտաքին տեւական ու յաճախակի ցնցումների աղբիւր կարող են հանդիսանալ: Ինչ վերաբերւում է արտագաղթին, ապա ներքին կայունութիւնն ու համեմատաբար բարեկեցիկ սոցիալ-տնտեսական պայմանները ոչ միայն չեզոքացնում են նման մարտահրաւէրի հնարաւորութիւնը, այլեւ խթանում են սփիւռքի միւս հայ համայնքներից, ինչպէս նաեւ Հայաստանից հայերի ներհոսքը դէպի այդ երկրներ: Արդիւնքում՝ այդ երկրների, յատկապէս ԱՄՆ-ի, Կանադայի, Արեւմտեան Եւրոպայի երկրների հայ համայնքները ոչ միայն չեն նոսրանում, այլեւ շարունակաբար համալրւում են նորեկ հայերով²⁰:

Փոխարէնը այդ երկրներում սուր է դրուած ուծացման կամ ազգային ինքնութեան կորստի խնդիրը: Ընդհանուր քրիստոնէական սոցիալ-քաղաքակրթական միջավայրը, տնտեսական եւ քաղաքական ազատութիւնները լայն հնարաւորութիւն են ընձեռում հայութեանը՝ արագ ինտեգրուել այդ երկրների հասարակութիւնների մէջ՝ իւրացնել նրանց լեզուն, սոցիալ-մշակութային արժէքները, բարձր դիրքերի հասնել քաղաքական, հասարակական, մշակութային, տնտեսական եւ այլ բնագաւառներում:

Սա, մի կողմից, նպաստում է հայ համայնքների եւ ընդհանուր հայութեան ներուժի մեծացմանը, սակայն միեւնոյն ժամանակ որոշակի սպառնալիք է ստեղծում ազգային ինքնութեան պահպանման համար: Տեղական հասարակութիւններում արագ ինտեգրման արդիւնքում հայ համայնքների ներկայացուցիչները սերնդեսերունդ կորցնում են ազգային ինքնութեան այնպիսի բաղադրիչներ, ինչպիսիք են՝ մայրենի

²⁰ Տե՛ս Հովհանն Վ., Հայկական սփիւռքի անվտանգութեան մարտահրաւէրները http://www.noravank.am/arm/issues/detail.php?ELEMENT_ID=12736 :

լեզուն, հաղորդակցութիւնն ազգային պատմութեանն ու մշակոյթին, ազգային ինքնագիտակցութիւնը եւ այլն: Տեղական հասարակութիւնների եւ հայ համայնքների փոխադարձ ներթափանցումը լայնօրէն խթանում են նաեւ խառնամուսնութիւնները, որոնք նոյնպէս լուրջ մարտահրաւէր են արտերկրում հայապահպանութեան համար²¹:

Այսօրուայ ԱՄՆ-ում, Կանադայում, Եւրոպայում ծնուած, այնտեղ մեծացած եւ բազմաթիւ մշակոյթներ կրող հայ երիտասարդը, որը երբեմն նաեւ մայրենի լեզուին էլ չի տիրապետում, շատ բնական է համարում ամուսնութիւնը այլ ազգի ներկայացուցչի հետ:

Ազգային նկարագրի պահպանման առումով յետ խորհրդային տարածքի հայ համայնքները նոյնպէս կանգնած են լուրջ մարտահրաւէրների առջեւ: Ռուսաստանում, Վրաստանում եւ միւս երկրներում, որտեղ հաստատուած հայութեան համար այնքան էլ խորթ չեն տեղի սոցիալ-քաղաքակրթական միջավայրերը, որտեղ հայութիւնը խորապէս ինտեգրուած է տեղի հասարակութիւններում, որտեղ հայերն իրենց վրայ կրում են վերջինների սոցիալ-քաղաքակրթական ազդեցութիւնը, լուրջ վտանգի տակ է ազգային ինքնութեան բաղադրիչների՝ լեզուի, մշակոյթի, պատմական յիշողութեան պահպանումը: Ակնյայտ է, որ խոր ինտեգրուածութեան պայմաններում յետ խորհրդային երկրներում մեծ տարածում ունեն նաեւ հայերի եւ այլազգիների միջեւ խառնամուսնութիւնները:

Հայերով բնակեցուած ամենամեծ գաղութը հանդիսանում է Ռուսաստանի Դաշնութիւնը: Այստեղ խառնամուսնութիւնների թուաքանակը չափազանց մեծ է: Դրան նպաստում են բազմաթիւ գործօններ: Նախ՝ լեզուի իմացութիւնը: Այնտեղ բնակուող հայերի մեծ մասը գերազանց տիրապետում է ռուսերէնին: Այստեղ նպաստող հանգամանք է հանդիսանում նաեւ կրօնը:

Գրեթէ տրամագծօրէն հակառակ իրավիճակն է տիրում Միջին Արեւելքի հայ համայնքներում: Այստեղ գերակշռող իսլամական միջավայրը, ինչպէս նաեւ քաղաքական եւ տնտեսական գործունէութեան սահմանափակումները որոշակիօրէն առանձնացնում են հայ համայնքներին տեղի հասարակութիւններից: Այս հանգամանքը նպաստում է ինչպէս լեզուի եւ ազգային ինքնութեան միւս բաղադրիչների պահպանմանը, այնպէս էլ սահմանափակում է խառնամուսնութիւնների քանակը²²:

Արեւելքի երկրները ունեն որոշակի իւրայատկութիւններ. նրանք հայախօս են: Համայնքի ներսում իրար հետ շփում են բացառապէս հայերէնով: Զգտում են իրենց երեխաներին անպայման տանել հայկական դպրոցներ: Այդ է պատճառը, որ արեւելքի երկրներում խառնամուսնութիւններ տեղի չեն ունենում եւ հայապահպանութեան ցուցանիշը չափազանց բարձր է: Ինչը չի կարելի ասել Եւրոպական երկրների, ԱՄՆ-ի, Կանադայի, յետ խորհրդային երկրների հայկական համայնքների մասին:

Խառնամուսնութիւնները հանդիսանում են այն թեմաներից մէկը, որոնց հանդէպ զգայուն են ոչ միայն Սփիւռք ունեցող, ազգապահպանութեան հարցերով մտահոգ հանրութիւնները, այլեւ՝ մարդիկ առհասարակ, նոյնիսկ՝ ազատականացուած արեւմտեան մշակոյթի ներկայացուցիչները: Պատճառն այն է, որ մարդը բնականօրէն ոչ անտարբեր վերաբերմունք ունի սեփական արմատների ու դրանց պահպանման հանդէպ:

Յաճախ կարելի է հանդիպել, թէ ինչպէս են հայ ծնողները դիմադրում այլ ազգութեան ներկայացուցչի հետ ամուսնանալու՝ զաւակի ցանկութեանը: Ամուսնացող անձի մօտ բախում են մարդուն բնորոշ պահանջմունքները՝ արմատներ ունենալու,

²¹ Տե՛ս նոյն տեղում:

²² Տե՛ս նոյն տեղում:

տեսակը պահպանելու ձգտումը, ինչպես նաև իր անձնական կեանքը տնօրինելու բընական պահանջմունքը:

Խառնամուսնությունները մշտապես գտնուում են թէ՛ քննարկումների եւ բանավեճերի կիզակէտում: Մի մասը գտնուում է, որ մարդը գործում է այնպես, ինչպես իրեն հարմար է: Միւս մասն էլ խառնամուսնությունների մէջ մեծ սպառնալիք է տեսնում:

Խառնամուսնությունների վերաբերեալ հոգեբանական տեսակէտը առաւելապէս ուղղուած չէ պատասխանել այն հարցմանը, թէ խառնամուսնությունը լաւ է, թէ՛ վատ:

Վերոբերեալից պարզ է դառնում, որ խառնամուսնությունները ներկայ աշխարհում անխուսափելի են: Հարկ է նշել, որ դրանք նաև բնականոն երեւոյթ են, որոնք մարդկութեանը ուղեկցել են իր պատմութեան գրեթէ ողջ ընթացքում:

Երբ խնդիրը դիտարկուում է անհատական հարթութեան վրայ, աւելորդ է ակնկալել, որ հայրենասիրական կոչով կարելի է ետ պահել այլազգիի հետ ամուսնանալու մտադրությունից. կան պարզ հոգեբանական եւ անգամ կենսաբանական մեխանիզմներ, որոնք պայմանաւորում են մարդկանց փոխադարձ գրաւչությունը, եւ չկայ ուղիղ համեմատական կապ ազգային եւ անձնային զգացմունքների միջեւ:

Ամուսնություններն էլ այլ ազգի ներկայացուցիչների հետ աւելի բնականոն են դառնում ներկայիս անդր-ազգային գործընթացների պարագայում:

Բուն հայկական Սփիւռքի ինքնութեան խնդիրներին անցնելուց առաջ փորձենք առհասարակ ճշգրտել ինքնութեան արդի իմաստաւորումը: Այսօր ինքնությունը քրննարկուում է ոչ թէ որպէս կայուն, անփոխոյն եւ մաքուր էություն, այլ բարդ, փոփոխական եւ փոփոխելի, բազմատարր նկարագիր: Խմբային ինքնությունները եւս բազմաշերտ են, եւ էթնիկական ինքնութեան կողքին ներառում են նաև ազգային ինքնութեան, քաղաքացիական ինքնութեան շերտերը, ինչպէս նաև խօսում ենք սփիւռքեան, երկմշակութային, կոսմոպոլիտ, եւ այլ ինքնութեան ձեւերի մասին:

Էթնիկ պատկանելությունն, անշուշտ, խմբային ինքնութեան հիմնարար ձեւերից մէկն է, որն ապահովում է արմատներ ունենալու եւ այդ արմատներին կապուած լինելու ձգտումը, այդպիսով անհատին ապահովում հոգեբանական անվտանգութեան եւ կայունութեան զգացումով: Այս իմաստով էթնոսն անհատի համար հանդիսանում է հոգեբանական հանրոյթ, իսկ էթնիկ ինքնությունը՝ դրա հիմնարար բնութագրիչներից մէկը:

Անկախ իրենց տեղակայումից՝ մարդիկ փորձում են նոյնականանալ սեփական էթնիկական խմբի հետ, եւ հակառակը՝ դրական էթնիկ ինքնություն ձեւաւորելու հարցում դժուարությունները առաջ են բերում խնդիրներ թէ՛ ներ-անձնային, թէ՛ ներ-խմբային ու միջ-խմբային յարաբերություններում:

Սակայն, ինչպէս նշեցինք, էթնիկությունը խմբային պատկանելութեան միակ ձեւը չէ, յատկապէս՝ այսօրուայ կեանքի պարագայում, որը ենթադրում է միաժամանակեայ ներգրաւում տարբեր խմբերում:

Ինքնությունների այսպիսի մեծ ընտրութեան պարագայում անգամ հիմնարար մեխանիզմներից մէկը, որով անհատներն ու խմբերն այսօր ձեւաւորում եւ պահպանում են իրենց ինքնությունը, շարունակում է մնալ ես-ուրիշ, մենք-նրանք յարաբերակցությունը:

Ընդ որում, այս հակադրումները միանշանակ չեն. դրանք կարող են փոփոխութեան ենթարկուել: Այսպէս, մի համատեքստում որպէս մենք-նրանք տարբերակման հիմք կարող է լինել էթնիկությունը, մէկ ուրիշում՝ սոցիալական ինքնութեան այլ ձեւեր, ասենք՝ քաղաքացիական ինքնությունը, մասնագիտական ինքնությունը եւ այլն:

Սփիւռքահայ համայնքի ներկայացուցիչը կարող է ընդհանրություն ապրել իրեն արժէքիմաստային դաշտով մօտ կանգնած, իր ամենօրեայ, շօշափելի սոցիալական իրականութեանը, իր քաղաքացիական ինքնությունը կիսող այլազգի հանրութեան հետ, եւ հակառակը՝ կոնկրետ շփման ժամանակ օտարություն ապրել հայրենակցի հանդէպ: Սա չի նշանակում, որ նա հրաժարում է իր ազգային արմատներից:

Այս ամէնը ցոյց է տալիս, որ միայն էթնիկ ինքնությունը մարդուն բաւարար չէ իր նմանների հետ շփում ունենալու համար: Յայտնի է, որ անհատն իրեն աւելի վըստահ եւ լիարժէք զգում է ծանօթ եւ կանխատեսելի միջավայրերում, եւ հակառակը՝ այն, ինչ անորոշ է եւ բաւարար ծանօթ չէ, առաջացնում է խուսափելու միտում: Այս իմաստով սփիւռքահայ երիտասարդի (ինչպէս նաեւ նոր միգրացիոն հոսքերի արդիւնքում այլ երկրում հաստատուած հայի) մօտ հայրենիքը թէեւ դրականօրէն երանգաւորուած, սակայն անորոշություն պարունակող պատկեր է բնակութեան երկրի համեմատ: Անհատն աւելի հեշտութեամբ իր կեանքի հիմնական իրադարձությունները կազմակերպում է այնտեղ, ուր անցնում է իր հիմնական սոցիալականացումը, ակուլտուրացիան, առօրեայ կեանքը:

Պէտք է նշել, նաեւ, որ առկայ են լինում որոշակի տարբերություններ գործող իրականութեան եւ պատկերացրած իրականութեան միջեւ: Վերջինիս մակարդակում սփիւռքահայ անհատը, ասենք՝ ինչ-որ երիտասարդ, կապուած է, հայրենակիցների հետ, որոնք մի մասն են հայրենիքի դրական, իտէալականացուած պատկերացումների: Իրական շփումը հայրենակցի հետ կարող է փորձութեան ենթարկել՝ ընդգծելով տարբերությունները եւ առաջ բերելով շփման խնդիրներ, անհարմարություն: Այդ ամէնի պատճառով անձը կարող է խուսափել հետագայ շփումից:

Օտարութեան մէջ խառնամուսնություններն անխուսափելի են, եւ դրանք կասեցնել ի վիճակի չեն ոչ ամենազօրաւոր եկեղեցին, ոչ ամենաազգային կուսակցությունները, ոչ ազգային դպրոցը, ոչ մամուլը, ոչ ընտանիքը²³: Ինչպէս Լեւոն Շանթն է բնութագրել. «Խառնազգիի ընտանիքը Բաբելոն մըն է»²⁴: Եւ այսօր մեր Հայ Սփիւռքի գերակշիռ մասը փաստացի ապրում եւ գործում է այդ Բաբելոնի մէջ²⁵:

Հայաստանի Հանրապետութեան եւ Սփիւռքեան բոլոր կառույցների գերակայ խնդիրը այսօր հանդիսանում է հայապահպանությունը, որի գլխաւոր գրաւականը հանդիսանում է խառնամուսնություններից խուսափելը եւ հայկական ընտանիքների ստեղծումը: Իրականացում են համահայկական բազմաթիւ ծրագրեր ինչպէս Հայաստանում, այնպէս էլ սփիւռքեան տարբեր համայնքներում: Առկայ է համացանցային մեծ հարթակ, որտեղ շփում են մեր հայրենակիցների տարբեր շերտերի ներկայացուցիչները:

Այս ամենով հանդերձ, չպէտք է մոռանալ, որ մարդը իր խառնուածքով եւ էութեամբ շատ բարդ էակ է, իսկ իւրաքանչիւր մարդ առանձին վերցրած իւրատեսակ անձնաւորություն է²⁶ եւ ինքն է ընտրում իր ապագայ կնոջը կամ ամուսնուն:

Ամփոփելով կարելի է ասել, որ Հայկական Սփիւռքն այսօր ունի բազմաթիւ խընդիրներ, որոնցից մեծագոյնը՝ ձուլման վտանգն է: Իսկ ձուլման առաջին պայմանը հանդիսանում է խառնամուսնությունը: Խառնամուսնությունների տոկոսը չափազանց

²³ Տե՛ս Ասազեան Ք., Ռ., Սերնդափոխութեան հեռանկարները Սփիւռքում, <http://lraber.asj-oa.am/6437/1/124.pdf>, էջ 124:

²⁴ Տե՛ս նոյն տեղում:

²⁵ Տե՛ս նոյն տեղում:

²⁶ Տե՛ս Աղաբեկեան Ա. Ա., Յարութիւնեան Ա. Կ., Պատմի դերակատարութիւնը յանցագործի ուղղման գործընթացում, Տեսական եւ կիրառական հոգեբանութեան արդի հիմնախնդիրներ, 5-րդ միջազգային գիտաժողով, հոկտեմբերի 23 - 25, Երեւան 2015, էջ 7:

բարձր է Ռուսաստանի Դաշնությունում, Եւրոպայում, ԱՄՆ-ում, Կանադայում, Լատինական Ամերիկայի երկրներում: Պայմանաւորուած կրօնական, քաղաքական, լեզուային եւ այլ գործօններով՝ խառնամուսնութիւններ գրեթէ տեղի չեն ունենում Արեւելքի երկրներում: Խառնամուսնութիւններից խուսափելու համար Հայաստանի Հանրապետութիւնը եւ սփիւռքեան կառույցները ինտենսիւ աշխատանքներ են կատարում՝ փորձելով ներգրաւել սփիւռքի երիտասարդներին համահայկական ձեռնարկների մէջ: Սակայն փորձը ցոյց է տալիս, որ այս ամէնով հանգերձ, հնարաւոր չէ խուսափել խառնամուսնութիւններից:

ԽՈՐՀՈՒՐԴ ԵՒ ԽՕՍՔ

Լաւ է ընելը քան թէ ցանկալը:

Ամէն մարդ կը կարծէ թէ իր սագը կարապ է:

Դաշոյնի վէրքը կը բուժուի, սակայն խօսքի վէրքը երբեք:

Եղէգը կը տոկայ հովերուն, մինչ հսկայական կաղնիներ կը տապալին:

Բարեկամին յարգը չենք գիտնար, մինչեւ զինք կորսնցնելը:

Հնազանդիլ գիտցի՛ր, որպէսզի օր մըն ալ ուրիշներ քեզի հնազանդին:

Հզօր է այն անձը, որ գիտէ իր տկարութիւնը:

Ոչ ոքի չհաւնողը աւելի դժբախտ է, քան ան՝ որուն ոչ ոք կը հաւնի:

Երեք տեսակ տգիտութիւն կայ.

ա. Անգիտանալ ա՛յն ինչ որ պէտք է գիտնալ:

բ. Գիտցածը լաւ չգիտնալ, եւ

գ. Պէտք չեղածը գիտնալ:

Զգուշացի՛ր այն աչքերէն, որոնք սխալներ տեսնելու համար բաց են, սակայն լաւ տեսնելու՝ գոց:

